

**CONVIVENZA**

# Dal gust da mes latg...

VIOLA CADRUVI

**D**acurt hai jau guardà il film «Lucy». I va per ina dunna, Lucy, che vegn sfurzada da prender ina droga che abilitescha ella da duvrar la cumplaina capacitaad da ses tscharvè (il film sa basa sin il mitus che nus dovrian mo diesch per-tschient da nosa capacitaad mentala). Grazia a questa droga survegn ella abilitads telepaticas e telechineticas ed a la fin sa transfurma ella en in supercomputer.

**B**asta. Il plot è in pau stravagà e lez n'ha era betg fatschentà mai suenter ils titels finals, mabain ina scena quasi al cumenzament dal film, nua che Lucy cumenza a cuntanscher tut sias capacitads mentales. Là telefonescha ella a sia mamma per dir adia, cunquai ch'ella pensa ch'ella moria bainbaud. Ed ella di: «Jau poss sentir tut. L'aria. Las vibraziuns. La gliעד. Tuttas parts da mias regurdientschas. Jau ma regord dal mal da la dentera. Jau ma regord quant lom ch'il pail dal giat era. Jau ma regord dal gust da tes latg en mia bucca.»

**A**bstrahà dal fatg che jau avess sco mamma probablamain l'emprim ina giada dumandà tar in tal telefonat sin tge trip che mia figlia saja gist, empè dad esser totalmain comuventada: quant inquiet-



tanta è l'idea ch'ils uffants pon tuttenina sa regurdar da tut quai ch'è capità cura ch'els eran pitschens?

**M**o schont sche jau pens a mia figlia ... Quantas giadas hai jau gia fatg tuppaddas en ses cuntorn, savend ch'ella na vegnia ni a sa regurdar ni a pudair raquintar insatge ad insatgi? Tge per exempel, sch'ella savess tuttenina puspè che l'emprima ramur ch'ella ha fatg suenter sapientivamain n'è betg stà il ramplunar dal bagger davant chasa, sco quai che jau hai pli tard raquintà a ses bab, mabain atgnamain ina toffa enorme da sia mamma?

**T**ge, sch'ella pudess tuttenina sa regurdar da tut las giadas che jau sun sesida ensemen cun mias amias mammas – ella sper mai en charrotscha – e co che nus essan ans lamentadas ed avain giè cumpassiun cun nus sezzas, perquai ch'igl è sim-

plamain uschè megastentus cun uffants pitschens?

**U**sch'ella savess da lezza giada, nua ch'il gutter cun il latg pumpà giu era sa svidà sur nosa maisa tschuffa ora ed jau hai simplamain puspè badiglià il latg cun ils mauns enavos en il gutter? U dal fatg che jau n'hai mai cumprà chaussas novas da trair en per ella, perquai che jau era simplamain memia marscha e memia ranvera? Ubain da tut quellas giadas che nus avain giè sex sin il letg gist sper sia tgina, bain savend ch'ella na sappia soverso da nagut?

**T**ut imaginaziuns pli che inquietantas. Da l'autra vart avess l'umanità probablamain bler menders problems, sch'ina tala droga vegniss x-insacura ina giada sviluppada. En il fratemp ma quietescha almain il patratg che, sche mia figlia avess in di da prender ina tala droga e da sa regurdar da tut ils eveniments da sia entira vita enfin sia natschientscha, lura avess ella almain insatge meglier da ma raquintar al telefon che da ma descriver, co che mes latg gustava.

**Viola Cadruvi ha studegià germanistica, istorgia e rumantsch a l'Universitad da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**

**La convivenza da las linguas e culturas en il Grischun – quai è il tema da la rubrica «convivenza». Quella cumpara mintga glindesdi en La Quotidiana ed en la Südostschweiz.**